



Utaratibu na Ukamilifu Vinaonekana

kwa Yote Aliyofanya

Basi akaja na Simoni Petro, akaingia ndani ya kaburi; akavitazama vitambaa vilivyolala, na ile lesa iliyokuwako kichwani pake; haikulala pamoja na vitambaa, bali imezongwa-zongwa mbali mahali pa peke yake.—**Yohana 20:6, 7.**

Kijana mmoja mwenye mavazi yang'aayo alikuwa ameketi kando ya kaburi. Kumbe ni malaika aliyelivingirisha lile jiwe. Alikuwa na umbo la kibinadamu ili asiwaogopeshe watu hawa. Hata hivyo kando yake utukufu wa mbinguni ulikuwa uking'aa, na wale wanawake waliogopa. Waligeuka ili wakimbie, lakini maneno ya malaika yaliwazuia. "MsioCOPE, ninyi, kwa maana najua ya kuwa mnamtafuta Yesu aliyesulibiwa. Hayupo hapa; kwani amefufuka, kama alivyosema, Njoni mpatazame mahali alipolazwa. Enendeni, mkawaambie wanafunzi wake kwamba amefufuka katika wafu."

Wakaangalia tena kaburini, na wakasikia tena habari njema. Malaika mwingine mwenye sura ya kibinadamu, alisema: "Kwa nini mnamtafuta aliye hai katika wafu? Hayupo hapa, amefufuka. Kumbukeni alivyosema nanyi alipokuwa akaliko Galilaya, akasema: Imempasa Mwana wa Adamu kutiwa mikononi mwa wenye dhambi, na kusulibiwa, na kufufuka siku ya tatu."

Amefufuka, Amefufuka! Wanawake hawa wanayarudia maneno haya tena na tena. Sasa hakuna haja ya manukato ya kumpaka. Mwakozi anaishi, na si mfu tena. Wakakumbuka sasa, alipokuwa anazungumzia kuhusu kifo chake Alisema kuwa atafufuka tena. Ni siku ya furaha kiasi gani kwa ulimwengu! "Wale wanawake wakaondoka upesi kutoka kaburini kwa hofu na furaha nyingi; wakaenda mbio kuwapasha wanafunzi wake habari."

Mariam alikuwa hajasikia habari hizi njema. Aliwaendea Petro na Yohana na habari za huzuni kwamba wamemwondoa Bwana kaburini, wala hatujui walikomweka." Wanafunzi wakakimbia kwenda kaburini, na wakakuta kama Mariamu alivyosema. Wakaona vitambaa na lesa ila hawakumwona Bwana wao. Hata hivyo huu ulikuwa ushahidi kuwa Amefufuka. Sanda yake haikuwa imetupwa ovyo, bali ilikunjwa na kuwekwa vizuri. Yohana "akaona akaamini." Hakuwa bado ameelewa Maandiko kwamba ilimpasa Kristo afufuke katika wafu; lakini sasa akakumbuka maneno ya Mwokozi alivyotabiri kuwa atafufuka.

Ni Kristo Mwenyewe aliyeweka sanda ile kwa hali ya mpangilio hivyo. Malaika mwenye nguvu alipokuja kwenye kaburi, aliambatana na mwingine, ambaye aliulinda mwili wa Bwana. Na malaika kutoka mbinguni alipokuwa analivingirisha jiwe, malaika mwingine aliingia na kufungua 'sanda mwili wa Yesu. Lakini ni mikono ya Mwokozi mwenyewe ndiyo ilikunja sanda na kuiweka mahali pake. Kwake yeye ambaye hata hupanga nyota zote na kuongoza mwendo wao hakuna kisicho na muhimu. Mpangilio na ukamilifu unaonekana katika kazi Yake (Tumaini la Vizazi Vyote, sehemu ya 2, uk. 401, 402).